

卷十

書名 唐丞相曲江張先生文集二十卷 嘉靖十五年序新會鄧一新刊本
 撰者 唐 張九齡 撰，明 丘濬 編
 卷 卷十
 內容分類 集-別集-唐五代-盛唐
 索書號 仁井田 集 N4003
 編號 D7130401

[彩色首頁1](#)

[東洋文化研究所漢籍目錄 編號: D7130401](#)

[東洋文化研究所漢籍目錄所藏漢籍善本文影像資料庫 索書號: 仁井田 集 N4003](#)

[漢籍善本文影像資料庫文本唐丞相曲江張先生文集二十卷 嘉靖十五年序新會鄧](#)

[新刊本](#)

[版權所有: 東京大學 東洋文化研究所](#)

[使用上的注意事項](#)

唐丞相曲江張先生文集卷之一

頌
 賦

龍池聖德頌并序

開元紀功德頌并序

應圖贊并序

開元正歷握乾符頌并序

羽扇賦并序及御批

新賦并序

龍池聖德頌

玄德升聞皇天眷命元聖有作上帝何言



唐丞相曲江張先生文集卷之九
唐丞相曲江張先生文集卷之十
勅書

勅常州別駕董德運書

勅當悉羗首領書

勅許齊物書


勅隴右節度蔭成本書

勅安西節度王斛斯書

勅北庭經略使蓋嘉運書

勅安西節度王斛斯書

勅安西節度王斛斯書



文集卷之十
勅安西節度王斛斯書

勅安西節度王斛斯書

勅北庭經略蓋嘉運書

勅渤海使蓋嘉運書

勅四鎮節度王斛斯書

勅四鎮節度王斛斯書

勅安西節度王斛斯書

勅北庭都護蓋嘉運書

勅瀚海軍使蓋嘉運書

勅常州別駕董徽運書

勅常州別駕董徽運省所奏王昱及嚴正誨表具知
所緣卿父往在常州連年縱酒既加風疾行事乖踈
董念封經使具論王昱始奏停廢皆憑實狀不是冤
誣後自病亡豈可怨訴所言不直欲信無憑卿久襲
冠帶復拘法式寧不知此猶且有詞至於卿身合承
刺史比來未受亦則有由聞卿少年未閑撫字舉州
之衆交藉綏懷若蕃部不安豈虛此位卿若能自勵
從此改修父亡子及終不失舊卿表云部落據險幾
許無知亦慮惡人因此扇誘幸無他故勿取破亡今
故令內使往問部落及百姓等此事虛實還日具名

狀聞比極暄卿及部落百姓並平安好遣書指不多及

勅當息羗首領書

勅當息柘靜維翼等諸州首領百姓等前者令王承訓往宣問事止當州比其却來云諸州亦有所望州縣一也恩宣不均卿等祖父已來為國守境皆盡忠赤防捍外蕃朝廷嘉之官賞相繼近者處置未當又得卿表所論朕皆依行想皆遂願今聞吐蕃屯結近在安戎比來通和未有深隙計其不合為寇未知何故起兵卿彼臨邊各須伺候慮有侵軼損我居人若預圖之保無憂也其董懲董嘉宗已有處分訖其董念雙羗羗嘉弄等亦即續有處分必須嚴勒蕃部豫備惡人寇讐縱來計無所得我之深策豈不在茲卿等榮賞勿憂不遂今故令王承訓重宣徃意比已執首領百姓等並平安好遣書指不多及

勅雋州都督許齊物書

勅許齊物近者投降吐蕃云蕃兵已向南出鹽井比已勅達奚守珪蒙歸義訖卿可嚴備勿失事宜應須防守並委量事處分仍遠著斥候知其有無有則從權無則仍舊慎勿生事騷擾邊人秋中漸涼及吏人

已下並平安好遣書指不多及

勅隴右節度陰承本書

勅隴右節度使陰承本使人范正顏至省表具之朕於吐蕃恩信不失彼心有異操持兩端陰結突騎施密相來往事既醜露却以怨尤乃去姚雋用兵取其城堡略觀此意必欲為惡必不得先舉但須嚴備遠加斥候察其動靜若形兆已見馳狀以聞諸處軍城數加戒勒若不稱職速須改換今年交兵新到隴石未經戎事大須訓習在彼處置委卿裁之雖有邊虞固無憂也秋初尚執卿及將士並平安好遣書指不多及

勅安西節度王斛斯書

勅四鎮節度副大使安西副大都督護王斛斯及將士等突騎施輒凶暴侵我西陲卿等懸軍遇此狂賊爰自去夏以迄于今攻戰相仍念甚勤苦近者聞在撥換兵少賊多朕每憂之慮遭吞噬又聞兵勢漸合將士同心父子之軍亦不在衆犬羊之類復何能為屢有殺獲固其宜也卿等各負忠勇為國忘身鋒鏑之間瘡痍未免或致物故深用哀傷朱仁惠竟致淪亡良可悼惜具有褒贈以慰營魂福流子孫良亦在

此其有頻當矢石每戰有功義可成名勇能抗敵或
能出奇以挫凶威並具狀以聞即有優拔自餘戰士
盡力邊荒計其積勞又在絕遠至於行賞豈比尋常
勉樹功名即有官爵且北山雲間虜衆又疲歸途既
難必有携貳張義之將兵若至河西北庭兵又大集
滅胡之舉亦在今時可臨事圖之無失便也一勞永
逸豈不在茲所奏縱賓軌魏蹇等官及前年第一立
功入官並依所請訖告身即差使頒送初春尚寒卿
及將士已下並平安好遣書指不多及

勅北庭經略使蓋嘉運書

勅蓋嘉運等安西去年屢有攻戰醜虜肆惡懸軍可
憂卿深識事宜以時救援先聲既振後殿載揚凶黨
聞之卷甲而遁使我邊鎮且得休息然此賊為患勢
未必已可數與王斛斯計會每事先防彼將自勞衆
則離貳我因其隙從此可圖善熟籌之勿失便也春
晚卿及將士已下並平安好遣書指不多及

勅安西節度王斛斯書

勅四鎮節度副大使安西副大都護王斛斯等狂賊
經冬犯邊為梗將士守備不釋戈甲言念勤苦良深
嗟嘆既負忠義為國盡誠懦夫所難志士所重感激

增氣視死如歸古人之言今知之矣又聞此賊尋亦退散攻圍既解且得休息朕雖在九重心懸萬里念慮之至想所知之近既加兵惟憂糧貯諸處屯種今復何如逆賊有謀還慮殘暴必須善守無令損失若諸城有糧兵復足用忿戾之虜行應再來勞衆離心豈能無隙乘此一舉蕩滅有期宜善撫我人以待其弊小捷小獲何用此為春晚極暄卿及將士巴下並平安好今賜卿衣一副至宜領取遣書指不多及

勅安西節度王斛斯書

勅王斛斯得卿表并大食東面將軍呼邏散訶密表

且知卿使張舒耀計會兵馬迴此雖遠蕃亦是強國觀其意理似存信義若四月出兵是實卿彼巴合知之還須量宜與其相應使知此者計會不是空言且突騎施負恩為天所棄訶密若能助國破此寇讐錄其遠勞即合優賞但未知事實不可虛行卿可觀察蕃情頗有定否即須隨事慰接令彼知之若舒耀等虛有報章未得要領豈徒不實當有所懲絕域行人不容易也今秋此賊形候如何善須防之勿使侵軼時暑卿及將士巴下並平安好遣書指不多及

勅安西節度王斛斯書

勅四鎮節度副大使安西副大都護王斛斯及將士
已下朕雖居九重不忘征戍况強寇壓境侵軼是虞
言念勤勞良所嘆懣卿等各懷忠義不憚荒遐以此
彌年足見誠節去歲因有狂賊在彼屢有戰亡昨得
表言對之愴惻然卿狀但言都數其中不列姓名已
令勘責可速以實報朕當錄其死義贈以官榮使異
域之功存亡受賞近日狂虜形候如何屯收是時尤
須備預更資一熟亦復何憂兼聞吐蕃與此賊計會
應是要路斥候須明事必預知動即無患耳夏晚毒
熱卿及將士已下並平安好書指不多及

勅安西節度王斛斯書

勅王斛斯吐蕃與我盟約歃血未乾已生異心遠結
凶黨而甘言緩我欲待合謀連衡若成西鎮何有卿
能先覺有以待之觀釁而行適是軍法且屯苗既能
踐暴軍人亦被拘囚如李混之所言不反何謂然則
此蕃姦計頗亦陰深外示存約內實伺便事儻不濟
即云無負卿遠須知其變詐隨事交當使其退不得
以此為詞進不得成其凶計如此設拒乃為上策若
事已侵軼兵見交鋒即當率勵驍雄盡敵乃已秋冷
卿及將士已下並平安好遣書指不多及

勅安西節度王斛斯書

勅王斛斯卿在西鎮軍務煩勞皆能用心處置不失
頃與突騎施攻戰歷涉三年降虜生俘所獲過當懸
軍能爾朕嘉之行官已有賞勞在卿固合優獎今
受卿重職兼彼領護且復褒進終為後圖吐蕃此來
意不徒爾所有計校前已畧言先覺預防無能為也
萬里之外三軍之宜一以委卿勿失權斷秋後漸冷
卿及將士已下並平安好遣書指不多及

勅北庭經略使蓋嘉運書

勅蓋嘉運卿久任邊鎮庶事用心又去年出兵冒遠
入賊諸下皆賞卿豈無功言念忠勤不忘褒進今授
卿雄要仍兼舊官宜知朕心當重寄也突騎施雖請
和好其意不真近勅彼軍與天山計會當審觀事勢
遠着候人若有形勢事變先據如無應會不可虛勞
勢在臨時固難遙斷秋後漸冷卿及將士已下並平
安好遣書指不多及

勅渤海使蓋嘉運書

勅渤海軍使北庭都護蓋嘉運突騎施凶逆犯我邊
陲自夏已來圍逼踈勒頻得王斛斯表見屯遍城張
義之等入據此城屢與之鬪將士效節逆虜破傷已

不敢攻圍而頓兵不去但邊城糧少或為其所知持
久則難不可不早為計也卿可簡練驍武揚聲大入
仍有所保據以防不虞用解邊城之圍以挫逆賊之
勢臨機適委卿裁之仍與王斛斯審籌形勢取萬
全也今故令內謁者監王尚客往一一口具冬中甚
冷卿及將士已下並平安好遣書指不多及

勅四鎮節度王斛斯書

勅四鎮節度副大使安西副大都護王斛斯及將士
已下萬里懸軍屬此狂寇屢有攻戰能挫凶威遠聞
義勇孰不增氣卿等激厲將士為國盡誠決命寇讐

成名當代奇功壯節何謝古人矢石之間見危致命
良深嗟嘆重其忠烈又聞朱惠中箭今復何似善須
救療使得不死前令具奏陣亡將士欲加褒贈卿宜
識此意即以實聞近日與賊交鋒臨陣殺敵事須優
賞亦即奏來所云賊等請和仍尚頓兵北領此虜女
詐首尾百端示求和內將誘我卿所防慮皆中其
心然則益進北庭近亦深入頗有所獲想彼知之
虜庭乍聞當合驚駭若復分兵守境諸處防虞烏合
之胡豈堪勞役必將自潰勢亦不久蘇祿儻或覺此
革心請和亦復量宜以時開納仍與嘉運計會必取

良圖近所加兵且應支用臨事制變豈待言之今將
緋紫袍各二十領若有殊功應須速賞並委卿量事
賜之冬中極寒卿及將士已下並平安好遣書指不
多及

勅四鎮節度王斛斯書

勅四鎮節度副大使安西副大都護王斛斯蘇祿忘
我大惠敢作寇讐屢犯邊城將肆其惡雖禽獸是似
而天地不容卿等義心固所發憤朕已勅河西節度
使牛仙客令河西於諸軍州及在近諸軍簡練驍健
五千人并十八年應替兵募五千四百八十人即相

續發遣卿可與蓋嘉運計會取彼道便隨事進討使

此賊救首救尾形勢分離本既烏合勞則自潰若以

計取可不戰而擒若守而不攻益為後患卿彼諸將

皆是舊人既諳山川又能料敵兼與北庭并力事亦

可圖無為端然連年受弊所緣邊鎮要切並委卿臨

事籌之可與蓋嘉運務量勿為彼此之計也所緣兵

募行賜則公所由支遣已別勅牛仙客訖四鎮蕃漢

健兒並委卿隨所召募可得幾許仍具數奏聞史震

龍交可汗即令彼招輯兼與卿計會並臨事處置無

失所宜冬中甚寒卿及將士已下並平安好遣書指

不多及

勅安西節度王斛斯書

勅王斛斯累得卿表知賊等肆惡終冬不去又聞將士與鬪致有殺傷諸胡携離將自此始朕此為料亦以為然卿受哥遠方悉心奉國撫巡將士皆得輸誠萬夫一心以少擊衆雖有狂寇固無遠憂朕所懸官爵惟賞忠義苟能盡節亦豈忘功卿可慰勉將士知朕此意若有殊效即具狀以聞且蘇祿凶徒本是烏合今其師老必有怨嗟至如骨咄王子來投已是其效何國胡不受處分亦是明徵其下離心已至於此可令間諜更誘其餘此賊敗亡將從內潰且四鎮絕遠皆是孤軍卒欲益兵頗難救急近已勅牛仙客且送五千人其餘驍勇亦即繼發并勅北庭計會卿可與蓋嘉運相知張皇國威誠在此舉俘滅醜虜今也其時勉樹邊勳以成不朽冬中甚寒卿及將士比並如何遣書指不多及

勅北庭都護蓋嘉運書

勅北庭都護蓋嘉運近得卿表知舊疾發動請入都就醫欲遂來表慮有邊要萬一失便雖悔何追且蘇祿猖狂方擬肆惡邊城經冬不去西州近復燒屯亦



有殺傷想所聞也此賊諸頭抄掠虜衆已疲亦無能
爲正可取便至如西州近者有賊其數無多烽候若
明密與兩軍作號首尾邀擊立可誅剪何爲當軍自
守信賊公行來有損傷去無關鑿豈是邊鎮之意也
且西庭雖無節度受委固是一家有賊共除有患相
救萬里之外何待奏聞自此之後必須用意今遣醫
人將藥往可詎自將療春初餘寒卿及將士並平安
好遣書指不多及

勅瀚海軍使蓋嘉運書

勅瀚海軍使北庭都護蓋嘉運及將士已下蘇祿爰
自今夏連犯西陲犬羊之群屯結不散誠欲出其不
意乘虛以入凶黨聞此必自解圍卿識朕心有符成
料比王尚客至聞已出師窮冬絕漠荷戈冒險又聞
有所擒獲張我國威言念忠誠良深賞歎在此行也
四鎮狂虜必應抽退彼既有效應合叙勞兼云擒獲
人當優賞宜具實狀一一以聞然此賊爲惡勢將未
已若困窮或言實則不知安西近亦加兵卿彼士馬自
足可與王斛斯計議遂要圖之春初餘寒卿及將士
已下並平安好遣書指不多及

唐丞相曲江先生文集卷之十





明倫彙編

家範典

